

王文公全集之而谷詩存

# 足音錄

璧山王儀修元文著

## 足音錄 卷之三

而谷王宜撰

**銀婚** 結綰二十五周年，西俗謂之銀婚 己未（1979）

歐風吹赤縣，美雨沐銀婚。念五年華速，九千日月敦。齊眉憐玉案，駐景惜靈根。瓦缶難為器，珪璋易示尊。情長安反側，道足定乾坤。雙燕呢喃語，知春又到門。

**上巳**

上巳年年三月三，流觴曲水此心甘。田家不習五行傳，蛙鼓唯知一味憨。杜宇天橋聲切切，桃花人面影鬢鬢。漢陽祈雨王知縣，鐵史藏書鄭所南。

**閱尼克松回憶錄**

一齊眾楚咻，迪克展嘉謀。熊掌饒伸亞，龍睛引向歐。同儕欽法戴，前輩仰英邱。再起為馮婦，三顛笑沐猴。義牙何日落，妖夢幾宵浮。紙上風雲在，君功逐水流。

**寫意**

孔知地理老天文，謹獲真心我亦云。尿轉胞中今夜（嵇康）嬾，藥尋山上昨晨（劉晨）勤。鄰家火乞諸姑媼，閭左風生十字濱。最是梅開香到骨，明珠一粒重千斤。

**閱卷二首** 己未之夏去北碚西師評閱高考試卷

暑氣炎蒸道里艱，公車終近縉雲山。行經此碚人如鐵，步入西師路轉彎。字句細評珍點滴，文辭長量略疵斑。雌黃十日誠辛苦，取士憐才幸勿慳。

長官慎事制規嚴，每卷密封二五槓。一字不移安可訓，半分必計豈非饞。諸生靈氣無由見，主考陳腔未足喃。閱畢登樓舒鬱結，嘉陵江上動風帆。

**曉起**

瀟瀟江雨送黃昏，暑氣潛消睡意敦。枕畔雞聲驚客夢，床前

月色動詩魂。觀空成癖常開眼，覓句无心偶閉門。天外飛來清思絕，彩露烘染遠人村。

### 雜詩五首

《玉屑》曾經記半山，詩家語每示斑斑。溪橋忽見情无限，臥對鷓鴣句太艱。溪橋稼軒詞，臥對岑參詩

龍畫一鱗士寫心，瑤琴弦外有餘音。沈園柳老无多話，的是千年痛苦吟。沈園放翁詩

直率迂回取自然，雄奇平淡易而難。天衣无縫誰能織，老樹著花也自娟。老樹聖俞詩

千里鶯啼瑣二喬，升庵辨誤彥周調。我聞南國前朝事，並屬情音笛與簫。鶯帝二喬，並牧之詩。楊謂千為十之誤，許謂只慮二喬不識大體。就詩論之，未必然也。

木槿雖花姿近拙，水仙沒骨態仍妍。詩文有道非關句，栗里漆園是寶笈。陶詩莊文无出其右者。

### 秋日

舊夢從頭記，新知取次賡。長風天地濶，秋日古今情。

### 垓下 綴項羽本紀成篇

何者為王何者霸，霸王率軍壁垓下。漢魏以來成任滅，惟此一戰最无價。八千子弟餘幾多，夜聞四面皆楚歌。自飲軍帳氣仍豪，美人名騅可奈何。潰圍南出陰陵沱，田父給之誤向左。楚騎一時陷大澤，漢兵漫野燃眉火。七十餘戰是身經，當破擊脹无不可。未嘗敗北宰天下，今者豈非天亡我。願為快戰三勝之，大呼急馳震漢師。斬將奪旗山動搖，瞋目怒叱水倒移。赤泉侯輩何足齒，人馬俱驚避數里。三斬漢將復聚眾，僅乃亡我兩騎耳。烏江船長櫂船讓，江東雖小亦足王。知公長者賜公騅，徒步迎敵更接仗。以一戰百芟草束，眾寡

懸殊身亦創。顧見漢騎呂馬童，持劍高呼別无恙。若為故人吾汝德，贈汝頭顱可食邑。自刎而死身五分，楚地皆降紅一色。惟魯不下何區區，原來彼有君子儒。漢王發哀為之泣，魯公禮葬穀城隅。

### 洪秀全

上帝臨汝勿二心，漢官威儀異當今。惜夫十四年功烈，化作楊韋劍上音。

### 孫中山

逐虜深知豕吃羊，醫人醫國未相妨。千年帝制從公廢，遺撼初終室引狼。

### 片羽

片羽值晨風，輕揚三萬里。扶搖更邁上，升騰方未已。天清地以寧，飛勢乃可止。于時顧八荒，乾坤斯定矣。回翔廣宇間，逍遙遂无比。但願普天下，有情皆如此。

### 己未送歲二首

參遍野狐禪，歷經五未年。童心不異昔，耳鬢已如棉。九曲水終直，八方陣本圓。新春期指日，送歲亦欣然。一年三百六，知過不知功。世絡縱鉤弦，仙心外窮通。良醫三折可，大道九垓空。歲竟書黃紙，翩翩舞惠風。

### 郊行歸來 庚申（1980）初二

迎得春溫緩緩歸，卅年塵影卻依依。真人寤寐原無夢，何事莊周化蝶飛。

### 春禽三首

鳩：淑人君子久心儀，割麥插禾絕妙辭。梟不更鳴頑怙惡，鵲能借住智若愚。河洲任我非今日，捕放由人是昔時。假令邯鄲无一獻，何緣明發翰飛奇。

**燕：**來賀祇因大廈成，勾芒春社遠相迎。頷肥萬里封侯相，尾剪千秋細柳營。落月屋樑思舊侶，凌雲竹筍証新盟。最憐綉戶呢喃語，銷盡胸中百不平。

**鵬：**啼血千年事有无，幾回古史記魚鳧。魂留枝上三春煖，聲喚人間萬彙蘇。帝女自名原共病，峽猿哀轉每相俱。不如歸去歸何所，極目天涯認坦途。

### 桃源行

穆王八駿瑤池好，弱水三千事縹緲。蓬萊海上靄煙波，祖龍當年夢魂遶。至竟孤棹入桃林，洞天福地一探尋。漁樵至賤帝至尊，失者有心得无心。緣溪捕魚忘路迴，卻到源頭觀內景。黃髮垂髫怡然樂，鳥語花香欣晝永。東家招飲又西家，敬菜加餐更獻瓜。窓前綠竹婆娑舞，檐下新桑映日斜。此中人語傳妙諦，絕秦最是第一義。自漢以下不足云，方外仙踪存大制。草榮節和四業隆，文物衣冠今古同。按制輸將靡王稅，人真世普國亦豐。可惜漁子仙緣薄，桃林回望境非昨。千年幽蔽幾時開，二十四史空寂寞。今來溪水仍潺潺，桃花開落年復年。武陵佳氣自成春，不知何日可忘筌。

### 荅吳介怡醫生游尚方山

展誦新篇四韻工，卅年前憶訪高穹。舟行湖面追明月，雨過山坳躡太空。居士有詩真婉峭，野花无主更緋紅。遊人去後留佳句，盡在疏林暮靄中。

### 折紫蘿蘭一枝送大妹仁文

七月初八來我寓，初九過江治病，十一轉吳灘，臨行贈之

初夏新栽幾草花，紫蘿蘭勢最橫斜。一枝折送仁文妹，會見繁星燦汝家。

汝家僻遠在吳灘，偶爾相逢亦鮮歡。堪歎人生太勞苦，慰君

惟此紫蘿蘭。

**哭大妹仁文三首** 大妹名德修，己巳歲三月十八日未時生于煙河老屋，庚申歲七月念六日病逝于璧山醫院。

哀哉仁文妹，德充壽何促。五十才過一，遽尔上仙錄。昨日吳灘來，已初到我屋。言笑如平時，步履亦輕速。我匆備午餐，惟增和水菽。汝助擇藤菜，與嫂話家曲。一飯誠儉約，清談仍肅穆。我為汝添飯，汝推己果腹。疑汝未必飽，知汝每自束。飯後略休息，欲行汝來告。明旦兄六十，侄婚期亦卜。今當趕赴吉，二哥可同躅。我以俗務纏，此行讓汝獨。臨分我相送，途中汝屢囑。重門尚大開，勿送快回足。佇街望汝去，背影猶在目。誰知此一別，終天不再復。送汝未能遠，疚心我永惡。聞汝至來鳳，疲累更相偈。下車坐道旁，久俟無人熟。獨又強步行，鄉路記昔夙。行行近屋側，親愛到草木。別來忽十年，心湧潮起伏。疾趨登階除，傘落忘執搨。入室喜何似，情深切骨肉。恨汝非顯貴，隨行无童僕。迢迢逾津壁，一人真勞碌。還坐兒時床，能不多感觸。此時突病作，天旋地似覆。聲啞不能言，有命如何續。村醫勉處方，鄉醫但舌縮。縣醫且輸液，至夜終不祿。輾轉就醫三，輿車竟日逐。顛倒人不堪，況乃病至篤。嗚呼天謂何，令善翻无福。噩耗迅傳來，驚雷震陵谷。相別只半日，生死如轉轂。五丁挽不回，百身无由贖。痛徹兄肺肝，茫茫望空哭。

（七月二十六日）

哀哉仁文妹，離世息三天。遺蛻雖獨留，靈爽何時還。前日聞噩耗，悲痛摧肺肝。昨日強振作，奔喪欲撫棺。申末抵舊居，銘旌已在山。急趨歸骨所，黃土汝長眠。蓋棺不得面，封土不得觀。我淚流縱橫，佇立汝墳邊。相距未能丈，遠隔

九重泉。在生見兄來，相呼何欣歡。此時立汝旁，如何无一言。我哭汝不聞，泣血灑人寰。幽室一已閉，欲見永无缘。恨我到來遲，不及相抉牽。從此托山阿，誰憐形骸單。從此秋復冬，誰憐野風寒。今晨禮望墳，化靈焚旌旛。肴觴徒虛奠，人逝渺如煙。心知人天隔，夢裡會亦艱。午後我轉津，別矣登壟阡。三步一回首，猶見兩花圈。晚至德感寓，墳景耿心間。向來離與合，追念紛萬千。憶昔幼小時，私家煙河灣。壩上柑子園，一遷復再遷。嬉戲呼德娃，雀躍垂雙鬟。啼笑儘天真，旖旎猶眼前。稍長各入學，分處少相關。既遭鼎革變，擇婿汝自專。本願得自由，遠適到吳灘。婚後累家口，撫育擔雙肩。操作夜繼日，廢寢或忘餐。二子三嬌女，教養萬辛酸。歲月漸成人，汝今盡棄捐。妹也如有知，寧不暗淚潛。我亦苦生事，索居阻山川。相見日以少，一見一哀顏。猶記公社初，三載號天乾。吾鄉罹此難，先君新上仙。兄妹會德感，苦語話聯翩。過江散心回，同坐輪渡船。汝以孝友心，情我瘦且孱。糖果送我口，我淚隨瀾洑。此情如昨日，忽忽二十年。嗚呼念至此，椎心我何堪。骨肉緣枝葉，顛倒汝先殫。今生行已矣，來生更渺然。（七月二十八日）

哀哉仁文妹，逝矣永歸寂。平生苦與樂，一例无留跡。徒結兄妹緣，聚少別離百。炎寒五十載，如駒馳過隙。見汝號啼生，見汝臥窀穸。我老死宜先，不意汝先革。我發他生願，兄妹重經歷。相會定痛哭，一一話疇昔。此願知虛幻，益悲風雨夕。年光縱倒流，音容何處覓。人生盡苦空，為女尤不易。世多勤賢婦，汝實婦中伯。身擔家計千，從不求人惜。笑語向鄰曲，神采終奕奕。自從病心來，甚憂血上逆。忘食諸膏腴，致今日瘦瘠。命貴逾千金，養生如獲璧。本當以補

足，汝以損求益。既多資生勞，又復養失策。乃欲根蒂堅，差誤詎咫尺。我嘗數相勸，汝疑何能釋。迤邐至今日，終乃入冥宅。嗚呼天地間，兄妹皆過客。汝已居之安，那問生者感。我尚屬有情，念汝終不懌。傷痛西州門，靈床悲一擲。明日又何似，難免塵勞積。慟哭亦有盡，世事長天碧。（八月初三日，首七之期）

### 中秋夜雨二首

零雨丁冬夜未央，天公何苦斂蟾光。脊令逝去无留迹，坐對孤燈自斷腸。

老妻聽雨過中秋，月餅如盤抵素羞。癡女不知悲苦事，又將孀喪話從頭。

### 大妹仁文斷七悼詞 十月廿三日（九月十五日，霜降）

凡我兄妹，四男四女。遭時不辰，歷經風雨。水北山南，抑鬱分處。三十年間，未嘗團聚。偶或往來，亦少笑語。資生多勞，備極辛苦。我冀晚年，咸得安所。兄妹相期，老屋容與。不意今秋，汝竟作古。日月飛馳，如箭發弩。忽焉斷七，望鄉悲楚。叩拜禱告，仙佛聖祖。冥福超昇，永錫于汝。逝矣仁文，幽明道阻。我縱念切，哀懷莫吐。神靈感通，當共天宇。

### 臨蘭亭帖口占 十月廿六（九月十八）日

蘭亭修褻古風流，曲水稱觴樂事幽。俯仰之間已陳迹，死生大矣痛无由。

### 代簡

君住嘉陵曲，我住金沙畔。皓月共一天，兩地如相見。暫別四十年，人生忽過半。回首風雨夕，難忘百憂患。彼哉共工氏，爭帝生戰亂。怒觸不周山，群星四飛散。我有平生契，



亦多罹罪難。死者无見期，生亦遠河漢。親朋盡一哭，師友惟長嘆。空桑不勝情，吾輩當腸斷。可幸留頑軀，與君互輝燦。登山雖不及（雷君去山區勘探石油歸來），飯量仍足羨。

### 庚申誕日 用放翁登城門樂望韻

沐雨櫛風古渡頭，藏名不用借荊州。光陰五八爐中雪，夢幻三千鏡裡秋，欲煉金丹師抱樸，先嘗白酒賦登樓。一盆殘菊香仍淡，俯仰人間幾去留。

### 誕日醉歌 用放翁九月晦日作韻

盆菊檐前燦一叢，算來節候應凋空。隻因寓主原為客，故令相將對晚風。

平生最愛菊蘭梅，投老相將亦快哉。為有同枝新斷折，不勝悲緒暗中來。

老眼昏花避世塵，回思往事似魚鱗。一輪甲子參差近，自笑如余又幾人。

笑我癡頑老不死，桑麻長想底時還。遙憐屋角瀟騷竹，猶拂斜暉滿故山。

### 大妹仁文百期悼詞三首 時在江津文廟開政協會

百日匆匆過，仁文去不回。二哥空有淚，灑向望鄉臺。

鏡裡驚添白，仁文无還期。二哥開淚眼，惟見朔風吹。

天蒼蒼霧靄，地莽莽雲平。德微知仁息，不勝手足情。

晏嬰曰：仁者息焉，不仁者伏焉。死也者，德之微也。

### 漫興 是日除夕，立春。

我有衝霄志，臨風惜羽毛。尼山觀鳳翥，蒙縣仰鵬翱。我有餐霞想，隨時醉濁醪。人間留火種，天上摘仙桃。世事陂陀路，慈航滉漾篙。雲虹（雲虹，聖經故事）長記取，鯨水尚滔滔。

### 春興 二月初七 辛酉（1981）

行雲流水几江開，柳眼輕舒笛韻哀。解語幽花馨院落，出泥稚笋立牆隈。桔槔俯仰由人引，魚鳥從游斷物猜。莫歎伶俜依草木，此心久矣結靈胎。

### 梅嶼恨跡三首 “西湖佳話”之一

蕙貌蘭心二八齡，孤山獨對牡丹亭。鶻鶻無奈河獅吼，紫玉成煙又小青。遭妬之恨

人間天上歎參差，劫後惟存幾首詩。尔亦英雄誰識得，夕陽青紫暮山悲。殘詩之恨

絕妙年華絕世容，驚鴻翩矣婉游龍。千秋梅嶼精靈在，長繞湖山古廟鐘。精靈永生

### 晨望偶成二首

霧中初日似橙紅，我愛橙紅出霧中。豈料雲開朝霧散，橙紅嬌好卻成空。

初日橙紅百有情，雲開霧散忽生明。橙紅原是迷離夢，一露霞光萬象清。

璧城二首 故鄉璧山縣一別已二十六年。今有事來城小住九日而去，詩以誌之。

璧江西逝我東躋，念六歸來換世容。舊巷經過勞想像，故人邂逅訝龍鐘。試尋亥步情无限，偶話丁年興最濃。桑梓緣慳留不得，行雲猶自撫孤松。

故舊寥寥訪與探，龍梭山下幼曾諳。幾行星火明清夜，一派風煙上翠嵐。笑我真如遼海鶴，逢人漫問浮丘庵。文峯塔毀橋仍在，何日結廬傍市南。

### 大妹仁文辭世周年悼詞 農曆七月二十六日。陽曆九月五日

金風侵袖白雲飛，新淚仍添舊著衣。逝水无情人更老，家山東望倚荊扉。

死生異路徒心齋，彈指期年百事乖。猶記送行如昨日，望君背影立長街。

電掣光陰一歲過，望君不見只哀歌。明知永世難相會，姊妹情深老淚多。

淚向家園洒不停，仁文辭世已周星。可知留下菊霜訣，醫我今朝趾上疔。去秋仁文過我寓，閒談中謂曾以菊花葉瓦霜草治人毒瘡，有奇效。

今我大趾掌間，熱腫難堪，賴此方得愈，特志以此詩

**和愍公忌日** 農曆八月初一。陽曆九月一日。

哲人遭末世，遊殼悲中央。洗耳呼牛馬，充腸咽草糠。慈光鄉共沐，俠氣海難量。自失趨庭訓，時乎念載長。

**秋日**

秋來寰宇淨無塵，試學王褒賦化倫。雲裏崑山開萬壑，日邊滄海湧千鱗。和光曄曄乾坤大，元氣氤氳歲月新。樂餌自然留過客，不須更問我何人。

**錦城秋興** 重九前夕去成都，小住八日

白髮隨緣次錦城，昔年豪氣未全平。雖猶病足觀金粟，不惜尋芳聽玉笙。籬菊依然開淡淡，秋波莞尔漾盈盈。劇憐五訪春熙路，物是人非暗自驚。

高樓明閣綺玻窓，秋日芙蓉燦錦江。時事百年雲聚散，英雄千古鳥單雙。角聲斷咽悲何極，墨灶生苔意未降。漫道閑情拋棄久，新來幾夜對殘釭。

**訪文殊院** 菊月十三，午後訪文殊院，院中花園已作茶室，望望去之。正殿掛滿書畫，惟數婦孺拜佛而已。

少習梵音老漸忘，偶然緣會過禪房。花園在望清茶苦，蠟炬成灰寶篆香。最上乘真難擬議，眾生相本易滄桑。滿堂書畫廣何境，師利文殊妙吉祥。

**旅魂** 去秋大妹仁文病卒，今冬繼母仙逝，兩度奔喪還鄉，天時人事傷痛何極！清夜夢回，泣成此律。儀修辛酉臘月十六記。

頻年生死旅魂隕，鏡裡何堪老態催。兩句扣門悲項脊，一篇如影哭袁枚。檐風撫己長懷故，柏酒憑誰共舉杯。猶有孩童心思在，夢中撲逐浴沂回。典用歸有光項脊軒志，袁枚祭妹文，邢子才冬日傷志詩，庚肩吾歲盡詩

**集陸八首** 摘放翁十三元韻七絕之句，集成八首，亦有可觀者。

遠游無處不銷魂，晚落空村學灌園。風月未須輕感慨，冷雲微雨濕黃昏。

別浦潮回岸有痕，癡頑不料至今存。開簾一寄平生快，自無俗物到山村。

輪囷肝膽與誰論，秋氣淒涼霧雨昏。天下蒼生未蘇息，初聞瀕洞怒濤翻。

村酒甜酸市酒渾，老書生病臥孤村。早知壯志成癡絕，且撥閑愁近酒樽。

江風吹雨暗衡門，臨水登山幾斷魂。不用採芝驚世俗，蒲團安坐地爐溫。

骨枯猶應此念存，人間隨處有桃源。平生祕訣今相付，煉骨城金不足言。

風卷江湖雨暗村，綠蔬丹果薦瓢尊。世間好景無無盡，鳳集城邊柳映門。

讀書本意在元元，萬事紛紛不足論。自古達人輕富貴，會傾東海洗中原。

陸詩贈足萬象，猶有可集之句，歲暮天寒，雅興索然，遂止。然意實未盡，後有達人廣此，是所殷望。辟玉山人記。辛酉臘月二十日

**移居** 二月自芙蓉院遷中院，因用五柳詩韻，得五古二首

十年芙蓉院，塵囂非靜宅。所愛有書讀，聞道死可夕。況前吳碧柳，成茲白屋役。如何此官舍，征用當避席。遂遷對門居，簡陋无今昔。冬涼與夏暖，語謔不足析。

新居號中院，託身宜有詩。三間竹木房，小廚磚砌之。夜寢日讀書，亦能學與思。閑坐風檐下，看花或移時。德馨比龍仙，古意乃在茲。我老已六十，但誠勿自欺。

### 雜詠

水自无情花自愁，水流花謝兩悠悠。花將謝盡人何在，水未流枯我白頭。

雙文遺恨有誰知，堪笑微之夢裏詩。多少拋文調墨客，鄭老爭唱格尤卑。

**題白屋詩人遺像**《海魂》試刊號中有白屋詩文數首且遺像在焉。有求悼白屋逝世五十周年詩文者，書此付之。

古道照人世所稀，于茲遺像僅見之。五十年間陵谷變，與日俱新白屋詩。總角嘗讀婉容詞，浪花砰磅哀无時。弱冠得哦兩父女，颯颯松風助淒其。拜識尊顏已隔世，不啻交臂失人師。憶昔學詩恥吟苦，閉門覓句非所取。地北天南豪氣存，野馬塵埃空自詡。《自敘》皇上震且賁，恨見之晚終何補。移花接木誠至言，韻諧辭達貫今古。宗旨人文歸一致，斧鑿龍門疑神禹。好道進技更无前，公詩公像足千年，我曾十載寓白屋（德感前寓所，為白屋詩人舊居，未必即白屋。），公已大衍息黃泉。存亡共喜生中國，側聞孔道有真傳。要自大同臻大順，三常四肥理應全。歌罷此意付蒼茫，注目長江倚雕欄。

### 春夏多雨戲作

用放翁“无日不雨”詩韻  
天公竟自壞天時，運轉星移北斗欹。淡日欲升芳艸岸，密雲又覆影荷池。三春花鳥來雖早，一夏風煙去卻遲。莫訝瑤程

羈雁足，蝶莊正好賦新詩。

### 逐臭蒼蠅 借徐黃詩題

逐臭蒼蠅且漫嗤，凌雲白雁足相思。可憐舐痔人千個，不及吟風酒一卮。野境本多煙瘴色，袁門詎少雪霜姿。嗜癩有客何堪問，款段追涼亦自奇。

### 雜詠四首 （與前雜詠合）

勸學修身不苟三，獨伸性偽有誰諱。後王禮樂仍多誤，瘖墨居然作指南。

地府魂游嘆老殘，深知人世醒獨難。明湖一席傾城話，口角流芳沁肺肝。

未聞雞犬聞刀兵，妄意中藏盡聖行。皮里春秋猶斫殺，人間何處不相爭。

夫子當年拜劉侯，渾身解數與神侔。如何陳蔡遭无厄，一例由回怨不休。

### 秋風

一夜秋風掃夏炎，獨醒人聽雨纖纖。蟬嘶古柳迎朝日，雀噪閒庭報喜占。帆路蒼茫餘白小，雲山仿佛現青尖。杖藜徐步留高跡，爽氣新來入畫簾。

### 盆蘭

託身幽谷裡，偶爾上花盆。書案從風靜，芸窓就日溫。仙姿本脫俗，真氣欲銷魂。宇宙何遼闊，因君悟道根。

### 喜伯娘鄧氏過寓所 桂秋中旬森修弟送伯娘來寓，小住半月。

大伯曩時上九天，艱難家事累三千。明燈夜話都陳迹，彈指光陰五十年。

### 喜顯謨么爸過寓所 菊秋之初，么爸攜么娘肖氏，靜修妹、純富侄來

寓，小住四日。

三十餘年共陸沉，鄉音阻絕喜親臨。兒時追憶猶如昨，老態癡頑幸至今。獨誦蘇公權字解，同吟朱子治家箴。盤桓愧少平原日，一別情牽梓樹林。么爸誦蘇伯衡權字解命我錄出，又同讀朱柏廬治家格言，以為樂。

### 誕日前夕

叢菊依籬爛漫開，天陰無雨且銜杯。人生六十悄悄過，猶有妻兒笑一回。

年來風雨不曾晴，但把殘棋子久擎。身外無人數甲子，自知六十誤三生。

### 六十述懷

玄默連閭茂，終陽偶得生。晦為來必日，辰星受時名。鳳竹方奔兔，萱堂正弄笙。煙河縈玉帶，旭日掛銅鉦。天運良知合，慈顏好夢馨。六齡初向學，升七始離龔。村館仍崇儒，官庠已罷經。入承父祖訓，出接友師評。舉世蘇張術，寸心老孔情。寢多難備及，日益易專精。斷爛治朝根，呻吟授課程。立身頻顧影，遜志欲忘形。歧伯醫何妙，嚴造卜最靈。春秋衰鬢白，風雨遠山青。小口侵寒夢，巨傀值左槍。蛀書成道典，閉戶謝堯旌。大義章章密，新詩字字勅。千山看杳靄，百姓願咸亨。意足通今古，情能息鬪爭。攸尊歸復命，所貴在立行。逸驥尋雲去，煙鴻過漠鳴。近憐莊子病，遠想黃河清。閑坐霜毛養，獨翔雁足慙。三千新世界，六十老迂僊。天上電霓幻，人間災難並。衛生帶退息，向道每咿嚶。揅智先恬靜，別秋又遠征。志存輿嶠島，心篆步虛聲。秋月流蘭櫂，春風動乳鶯。一清龍伯國，定與海鷗盟。

### 仲冬紀行四首

自江津經永川銅梁抵合川小住數日復經重慶返江津四處各得五絕一首

冷雨侵車蓋，污泥霸巷衢。籠蒸羊肉美，夜暖酒不沽。永川  
遙望平川白，冰凝草木花。山城添野趣，一傘竟誰拿。銅梁  
涪水嘉陵合，新橋接老城。眾中隨揖讓，莫嘆可憐生。合川  
霧散城如畫，馳車過大街。逃煩尋小食，誰會此情懷。重慶

**雪野** 冬月初十夜大雪，翌日從永川經銅梁抵合川，一路雪覆寸餘，實多年  
罕見

縱觀九野雪茫茫，禽鳥無知到處藏。火樹銀花還自放，瓊樓  
玉宇不勝涼。斷松踟躕依龍壑，折竹杈枒守鳳岡。唯有道旁  
田角草，任隨白練掩青裳。

### 迴風

迴風一曲最精神，依倚瓊樓絕世塵。峽裏煙光凝楚夢，江頭  
春水滯巴人。微親蓮粉潮生頰，暗接星輝月作鄰。雨過殘雲  
猶蔽日，經霜不改祇松筠。

**立春** 正月十一立春，今臘月二十二又立春

壬戌兩頭春，人康物候新。條風傳大信，憂道不優貧。